



Inatsisartunut ilaasortaq Aleqa Hammond, Siumut
Maani

Aalisartut Nuummi najugaqartunut atugassarititaasut pillugit apeqquteqaammut nr. 2010-135-mut akissuteqaat.

30. juni 2010
Suliaqnr. 2010-032825
Dok. Nr. 400720

Inatsisartut suleriaasiat § 36 imm. 1 naapertorlugu apeqquteqaateqarputit, tunitsivissaqartitsineq akillu eqqarsaatigalugit aalisartunut atugassarititaasut pitsaangorsaavigineqarnissaat pillugu Naalakkersuisut sunik pilersaaruteqarnersut? Apeqqut suliasaqarfinnut akisassanngorlugu innersuussutigineqarpoq.

Postboks 269
3900 Nuuk
Tlf. (+299) 34 50 00
Fax (+299) 32 47 04
E-mail: apnn@nanoq.gl
www.nanoq.gl

Makku pillugit aperivutit:

Nuummi aalisartut annertuumik ajornartorsiuteqarput, soorlu makkunanga:

- 1) Sapaatip akunneranut sisamariaannarlutik tunisisinnaatitaapput.
- 2) Tunisinerit tamaasa kiilunik amerlassutsinik aaliangersimasumik taamaallaat tuniseqqusaapput.
- 3) Akit nikeraqaat allannguuteqarajuttarlutillu akikinnermut siumut nalunaarutigineqarsimaneq ajortunik.
- 4) Aalisartut pisatik tunisatik immikkoortitereersimangikkunikkit tunitsivimmiit tunisat tamaasa mikinertut akilersorneqartarput, massa tunisinermit ilitsersuut malillugu tunitsiviup immikkoortitertussaagalarai.
- 5) Biologit saarullittassiissutissanik innersuussineranit aalisartut immikkoortortaqarfii tusarniarneqarneq ajorneri annertuumik ajornartorsiutigineqarpoq.

Apeqqutigiumavara qulaani ajornartorsiutitut taakkartorneqartoq Naalakkersuisunit aalisartunut oqilisaaniarnerminni sutigut iliuseqalersaarpat, iliuseqalersaarunillu qaqugu tamanna pissanersoq?

Apeqqutinut akissutit.

1-4) Apeqqutinut siullernut tunngatillugu ingerlatseqatigiiffik tunitsiveqartitsisoq KNAPK-llu akornanni isumaqatigiissutit, tunisinermit ilitsersuummi tunisineq pillugu allaaserineqartut innersuussutigissavakka.

Taakku saniatigut oqaatigineqassaaq, ingerlatseqatigiiffiit KNAPK-llu akornanni tunisinermit ilitsersuutit pillugit isumaqatigiissutit eqqortinneqassasut Naalakkersuisut isumagimmassuk. Naalakkersuisulli isumaqatigiissutinut taakkununga akuunngillat.

Tunisisarnermi ajornartorsiutit taasatit oqaaseqarfigineqartussanngorlugit Royal Greenlandimut nassiunneqarput, siullertut ajornartorsiut attuumassuteqartunut tunngassuteqartutut isigineqarmat.

Nuummi Royal Greenlandip tunitsivianut tunisisarnermut atatillugu Naalakkersuisut paasisaat malillugu ajornartorsiut suliarineqarsinnaasut killeqarnerannik pissuteqarsinnaasoq.

Kinguliani Royal Greenlandip Nuummi tunisisarneq pillugu saqqummiussannut oqaaseqaataata pingaarnersiorneqarnera 23. juni 2010-mi nassiunneqarsimasoq.

“Ullumikkut aalisarfiusumi 181 tonsinik annertussuseqarput, ullormut tulaanneqartartut agguaqatigiissillugit 6-8 tonsiupput imaluunniit suliarineqarsinnaasut 50 %-ii ataallugit.

Piffissami sulisoqarniarnermut tunngasuteqartut oqaaseqarfigisinnaanngilakka, tassanili suliarineqarsinnaasut appasinnerulaarput 100 %-imulli suli ungasilluni.

Piffissani tamani tunisinermi akit allannngortarsimannngillat, aalisartut tamarmik aamma tulaassat annertussusiat maleqqissaarlugu akilerneqartarsimapput, annerit 60 %-iusimasut qaffasissumik akeqartinneqarsimallutik - sinneri mikisut.

Ullumikkut aalisakkanut immikkoortiterneqanngitsunut akit atulersippagut, tamanna atorineqarsinnaavoq immikkoortiterineq oqilisarniarlugu tulaassisarnerlu sukkatsisinniarlugu.”

Pisunut Royal Greenlandip saqqummiussinera malillugu, piffissami akit allannngorsimannngillat, ullut tamarluinnangajaasa tulaassinerit ingerlanneqarsimapput, maannamullu tunisinerit suli killiliiffigineqaratik. Aalisakkanik immikkoortiterineq innersuusutigisannut tunngatillugu, tamanna tunisinermi ilitersuummi erseqqissumik allaaserineqarpoq kiisalu maalaaruteqarnissamat atugassarititaasut pillugit. Taamaalilluni suliaq illuatungeriit akuusut marluusut akornanni aalajangiiffigisassaavoq.

Tamatuma saniatigut tunitsiveqarfinnut allanut sanilliullugu Nuummi ingerlatseqatigiiffiit tunitsivigineqarsinnaasut marluunerat allaassutaavoq, ajornartorsiutinut uparuartukkannut tunngatillugu ilanngullugu tamanna oqaatigisariaqarpoq.

2009-mi junimiit oktoberimut, tunisat tamarmiusut 70 %-ii ullunit tunitsiviusunit 153-init 108-taasimapput sap. ak. naaneri ilanngullugit. Tamatumani tunisat annerusut minnerusullu ilanngullugit.

5) Biologit kaammattuutaat Pinngortitaleriffimmiit Naalakkersuisunut nassiunneqarsimasut kaammattuutaapput ilaatigut aalisakkanut paasisutissanit pisanullu paasisutissanit tunngaveqartut. Naalakkersuisut pisassiisutininik aalajangersaannginneranni, Aalisarneq pillugu Siunnersuisoqatigiinnut attuumassuteqartunullu soqutigisalinnut allanut pisassiisutissatut siunnersuut tusarniaassutigalugu nassiunneqartarpoq. KNAPK pisassiisutit

aalajangerneqarsimasut pillugit tusarniaanermut akissuteqarnissaminut periarfissaqarpoq.

Tunitsiveqartitsineq akillu eqqarsaatigalugit aalisartut atugaat pitsannorsaaviginiarlugit Naalakkersuisut sunik pilersaaruteqarpat?

Suliffeqarfii assigiinngitsut kiffartuussinissamut isumaqatigiissusiorfiginerini pisuussutinik annertunerpaamik atorluaanissamut arlalinnik eqqarsaatigisassaqarpoq. Ilaatigut pingaartinneqarpoq, tunitsiviit salliutinneqassanersut, akilersinnaasumik ingerlatsinissamut atugassarititaasut eqqarsaatigalugit, tamatumani tunitsiviit annikinnerusumik kaaviiartitaqartut akilersinnaassutsimikkullu appasinnerusut ingerlatsiinnarnissaat qulakkeerniarlugit.

Sinerissami tunitsivinnut allanut sanilliullugu Nuummi tunitsivik akilersinnaaneruvoq. Tunitsivinnut allanut sanilliullugu tunitsivimmut tunisisarnerup anneruneranik kaaviiartitallu anneruneranik peqquteqarpoq.

Suannik tunisisarneq naammasseqqammerpoq saarullinniarnertu aallunneqarnerulissalluni.

Aqutsinermi suliniutit, saarulleqassutsimut pitsaasumik sunnuteqartussaassapput oqaatigineqarsinnaavorlu saarullinnik aqutsineq nutarterneqartoq.

Inussiarnersumik inuulluaqqusillunga

Ane Hansen

Aalisarnermut, Piniarnermut Nunalerinermullu Naalakkersuisoq